

摘藻堂四庫全書薈要

集部

欽定四庫全書薈要卷二萬二百二十四

集部

明文衡卷七十一

明程敏政編

神道碑

元故嘉議大夫禮部尚書致仕贈資善大夫江浙等處行中書省左丞上護軍追封譙國郡公謚文節汪先生神道碑銘

宋濂

濂奉敕總修元史凡忠義循吏之事天下郡縣悉上送

官而宛陵汪先生獨闕既而先生族子克寬與纂修始  
以其門人汪文炳所撫事狀相示濂既命史官刪削立  
傳克寬以為史乃一代成書其法當畧墓文乃私所撰  
其紀宜詳復致其孫德厚之言請濂揭銘於隧上嗚呼  
先生之德之盛海內孰不知而所識錢珍之獄泰定實  
錄中嘗言之其可不備載以昭示方來乎先生諱澤民  
字叔志按汪氏其先新安歙縣人自唐以來為官族五  
季之初兵馬使都虞候道安始自歙遷婺源之還珠里

又歷八世至宋天禧己未進士祕書丞贈光祿少卿震

生慶厯癸未進士都官員外郎贈中順大夫宗顏都官

生皇祐壬辰進士左奉議郎知漢陽縣贈少傅穀又自

婺源遷饒州德興之龍溪少傅生贈通奉大夫樂崇寧

癸未進士正議大夫端明殿學士藻藻以文學政事為

時名臣通奉生紹聖丁丑進士朝散大夫江西轉運使

愷知合肥縣贈中散大夫愷又自德興遷宣州之宣城

子孫遂為宣城人中散生紹興庚辰進士通判隆慶府

鴻舉鴻舉之弟脩舉則先生高祖也曾祖諱宰臣贈朝奉郎祖諱夢雷淳祐辛丑進士累官知靖州元贈翰林直學士亞中大夫輕車都尉追封新安郡侯父諱鼎新用父蔭補將仕郎元贈嘉議大夫工部尚書上輕車都尉追封新安郡侯工部之兄鼎亨景定壬戌進士管池州大軍酒庫然自少卿至先生奕世科名蟬聯不絕先生自幼融通經史亦銳然思繼承之會科目之法行遂領延祐甲寅江浙鄉薦上南宮不利有司用恩例署寧

國路儒學正暨再舉遂擢戊午進士第授岳州路同知  
平江州事階承事郎時先生之母譙國郡夫人王氏春  
秋已高先生以平江道遠不可迎養上書丞相府乞降  
一二階就銓鄰州不報竟奉太夫人之官州有健民曰  
張以利餌長吏持其陰私使不敢問遂視閭井民若蟻  
虱頤指氣使輒奔走不暇稍违其意即繫送於官人懼  
呼為張雷公先生曰弗治我民將無生即發其姦屏諸  
四夷不使與良民齒李氏有兄弟者三素豐於貲季弟

未有子而沒其婦傷季之夭也誓終身不再適孟仲利其財數設計撼之婦堅不動乃嗾亡賴男子誣以姦私婦不禁撈掠自引伏先生見其色有冤間行廉察之悉得其情白而出焉轉承務郎南安路總管府推官戍將多爾濟跋扈自用搯有司之掣俾不得詘信其姍家王某為郡府史籍其威尤鴟張無忌擅筆大庾縣令縣令訴諸府同官懼戍將之威相視以目無人發一辭先生毅然捕王下獄會監察御史行郡戍將厚賂御史召先

生於庭詰其獄狀聲色俱厲先生徐曰王之姦路人所  
知也御史欲屈法邪御史慚夜半馳馬去王卒伏罪居  
亡何戍將以贓敗部使者知其故檄先生推讞杖罪之  
廣州歲祲民大飢疫癘洊臻死亡相枕藉其毒氣所薰  
蒸鮮有能生者江西行中書屬先生行振荒之政先生  
絕無所畏懼命大姓發廩以哺飢羸其病癘方熾者召  
醫注善藥親走其廬給之活者數萬先生暨從者亦無  
他虞將還送者懽曰我父母也奈何去之馬擁不能前



潮州判官錢珍挑推官梁楫妻劉氏不從誣楫冒糴官  
中米殺之獄中事連海北廉訪副使劉安仁逮繫者二  
百人中書移問者凡六各懷顧忌事終不白先生讞之  
獄立具時珍飲藥死詔戮其屍安仁坐受珍賂除名時  
朝廷遣奉使宣撫江西聞先生名命巡南安章貢二郡  
事得專決聲績尤著擢承直郎信州路總管府推官丁  
內艱不赴服除遷平江路總管推官階承德郎初浮屠  
甲與隣僧乙有隙久不相周旋衆約其輸平乙因邀甲

飲酒至醉遂寢其室甲弟子沈安素苦甲鞭笞且期速  
紹其業幸甲宿於讐夜持刀往殺之明日訴諸縣乙虐  
於考訊輒誣服獄上先生閱其刀有鐵工氏名召工驗  
焉曰此沈安刀也逮安一訊即承脫乙械械之嘉定地  
瀕海朱管二姓為姦利海中致貨鉅萬及以他事敗上  
下受其賂莫敢捕獄久不決先生與總管多通公適至  
徑縛以來竟籍其家及徵其帳厯備列省憲郡邑受賂  
之數惟先生及總管名下疏曰不受陞奉議大夫知濟

寧路之兗州兼管本州諸軍鄂嚕勸農事滋陽負郭之縣也孔子廟學久不建先生以風教所繫買地作之殿堂門廡及齋序之屬無不具飭襲封衍聖公職正三品先生以宣尼之胄不可以弗崇上疏請增其秩廷議諱之奏陞品為第二錫以銀章居一年政化大行絃誦之聲周達乎西東園扉之間可設爵羅嘉禾生於縣郊瑞麥孕於洸水君子謂其有漢循吏之風焉廉訪使者行部將壓境還曰汪兗州在吾可無往矣至正癸未詔修

遼金宋三史拜先生朝列大夫國子司業俾分修兵志  
及宋理宗本紀史成有上尊束帛之賜已而除集賢直  
學士大中大夫未數月亟上納祿之請以嘉議大夫禮  
部尚書致其事先生既歸僦屋以居門生弟子援洛中  
諸賢故事為築室宛水之濱先生日督諸孫讀書以自  
娛不知其貧歲壬辰蘄黃紅巾彭黨相構亂其餘孽自  
徽寇宣州江東部使者多通問策於先生先生語以收  
人心振士氣築城浚濠儲糧簡卒凡數十事寇再至再

擊退乙未夏六月長鎬叛帥瑣南班程述等挾兵渡江  
欲犯宣城城中兵不滿數百或勸先生去之民曰先生  
忠孝人也天必相之當相與守城若果去之吾屬亦隨  
之爾部使者實希沙周伯琦二公復申民言以為請先  
生曰昔江萬里寓番陽大將軍逼城衆皆走散猶坐守  
以為民望況宣民離合視吾去留吾何忍棄父母之邦  
乎時軍費不給加以嚴刑弗之集先生從容一言獲鈔  
一萬錠米三千斛民心翕然欲為固守計屢戰輒屢勝

八月丁丑江浙行省參政竒濟竒爾遣兵來援城內恃  
援至戍守頗懈是夜三鼓長鎗軍攀堞上城遂陷戊寅  
偽萬戶丁堅使前鋒葛義執先生逼降不屈遂遇害將  
死罵猶不絕口瑣南班等雅敬先生名為具棺衾葬於  
臬山之原得壽八十又三事上於朝贈資善大夫江浙  
等處行中書省左丞上護軍追封譙郡公下太常定謚  
曰文節云先生娶戴氏累封譙郡夫人先八年卒子男  
二人用敬以子貴封敷武校尉常州路宜興州判官用

和國子生辟充侍儀司舍人不赴兄弟痛憤不食相繼  
卒女一人適劉士禮孫男五人德宣以門資補官敦武  
校尉善盈庫副使德為國子生曲阜宣聖林廟司樂德  
崇癸巳鄉貢進士湖州路德清縣學教諭德正德進孫  
女一人適吳愈曾孫男五人禧源傳源鳳源書源清源  
先生軀幹脩聳高準疎髯風裁峻如也其為學本諸六  
經真知實踐無一事不本於道義其奉親也丁工部公  
之憂則三年獨處於外弗御酒肉每遇諱日悲慟不自

勝至老不變事母夫人則板輿方舟迎侍之官熙熙承  
顏唯恐少違其意婺源三大墓為強家所侵辦理於有  
司經四十年必復之乃已其事君也一飯不敢忘懷保  
小民甚如赤子革弊除姦有知殆無不為然於律已則  
玉潔冰清毫髮之私又無自而入故其至也民戀愛之  
其去也民慕思之至有為生立祠者嘗重構美章亭於  
究賊至不忍焚之且曰此汪公遺澤也嗚呼不知先生  
何以能致於斯哉由其立心之正不為勢利所誘擇術



之精不為不義所屈忠孝大節所以暴白於天下揆古  
無讓於今無媿可謂不負於科目者矣先生為文不事  
絺章繪句而義理自足詩亦清婉有魏晉風尤以善書  
名家單削片牘人咸藏弔楮利切置也為榮所著書有巢深

燕山宛陵三藁傳之於學者當賓興之歲江南三行省  
屢聘先生司其文衡士論尤服其精允至今人道之不  
忘也夫自壬辰之亂四方瓦解其能執節不回者往往  
於學士大夫見之如余闕之死於舒李黼之死於江台

哈布哈之死於台尤號傑然者也有如先生無城郭封疆  
之守或保身於山澤君子亦未必深議之先生不以仕  
止為間孜孜汲汲思衛斯民於危亡之際遂及於難非  
事君無二心者能之乎使人人皆先生若國家其有敗  
亡之禍乎悲夫系之以銘曰

仁皇建科璽書四布濟濟多士雲集用赴猗歟汪公薦  
舉於鄉對揚大廷乃第奉常筮仕遐邦不遑將母上疏  
廟堂願從近授孝聲載昭如水東馳公聞曰噫吾分之

宜鋤強擊貪鷹隼橫鴛去之弗亟我民之蠹叠為理官  
為獄立平起彼朽骨化而為生魯有名邦待公為政瑞  
麥嘉禾發為祥應策書載登金匱啟封袞斧之寄有詔  
倚公尋教成均六館咸悅復直集賢進班邇列公曰止  
哉吾懸我車秩宗之加以華其歸挂笏看山宛水之湫  
溝時艱屯四郊多壘氓之蚩蚩非公疇依公苟我留執  
戟以隨一鼓作氣爭相奮躍刈寇如麻血汙秋鐸孰援  
我兵夜柝不鳴彼乘吾懈遂無堅城毒霧四塞殺戮以

逞執公使降白刃磨頸嚼齒大罵我實王官咄哉賊奴  
敢正之于公雖遇害之死弗屈孤忠凜然皦如出日事  
聞中朝當宁嗟嘆節惠易名思寵有加所貴君子行為  
民望薄俗瀾奔障之東向生孝於親死忠於君凡百髦  
士視公為人

元國子祭酒孔公神道碑

堯舜禹湯文武及孔子德皆聖人惟孔子不得位而功  
最盛天於恒人有一善且昌其後昆況德充天地功施

萬世而身不食其報者乎堯舜禹湯文武皆王天下故  
子孫受其祉有限孔子無位故餘慶遺澤被其孫子者  
無窮自斯民之生未有若孔子之德而無位者也亦未  
有若孔子之傳世久遠而襲為封君者也嗚呼天之報  
聖人其在茲乎公諱克堅字璟夫世家魯之曲阜孔子  
五十五代孫也曾祖曰之厚贈某大夫濟寧路總管輕  
車都尉祖曰沆累贈通議大夫禮部尚書上輕車都尉  
皆追封魯郡侯父曰思晦嘉議大夫襲封衍聖公累贈

通奉大夫河南江北等處行中書省參知政事護軍追  
封魯郡公謚文肅曾祖妣女真氏祖妣李氏妣張氏皆  
追封魯郡夫人公少廓達通敏日誦千餘言始冠游學  
成均通春秋左傳文肅公薨襲封衍聖公階嘉議大夫  
元重紀至元五年上疏請脩飾廟像順帝可其奏賜山  
東厯日錢之半給其費命監察御史族人思立持楮幣  
二萬五千緡勒碑以紀成績至正六年中書謂公爵與  
階不稱奏陞之制授中奉大夫易銅章以銀十五年平

章政事達實特穆爾薦公明習禮學徵為同知太常禮儀院事以子希學襲公爵是年冬帝親郊公攝太常使盛服褫然登降有容觀者稱其達禮御史大夫蘇蘇言公才宜近侍左右拜中臺治書侍御史公辭歸明年拜山東道肅政廉訪使既受詔復辭會山東兵亂公率家人北行次藁城丞相賀太平奏召公為集賢直學士希學為祕書郎遣使者即藁城起之公至燕都劇盜毛貴犯畿甸且逼廷議棄燕遷關中公曰天子當與社稷宗

廟俱為存亡烏可棄而他之今勤王之兵頗衆與之決  
戰盜可平也如公言盜果敗去十九年遷禮部尚書知  
貢舉四方士避亂多集郡邑公請設流寓科以取之是  
年冬擢陝西行臺侍御史李思齊及察罕特穆爾二軍  
爭秦隴相攻朝廷不能制陝西行省丞相托里特穆爾  
納思齊降將命張弼禦之公及中丞袁渙諍曰不可二  
軍不敢舉兵犯奉元豈其力不足哉特以無名耳今納  
其叛將而出兵禦之是引虎使噬也丞相不從渙亦被



劾去公怒曰謀之不善亂且至矣遂自劾而歸月餘二  
軍及張弼戰於鹿臺奉元果陷一十二年除國子祭酒  
帝賜上尊太子書大成殿額以賜公以世亂不樂居位  
竟謝病歸闕里營別業城南以居後起公為集賢學士  
資善大夫不就復以公為山東廉訪使卒不起二十八  
年天兵取中原皇上手詔趣公入覲待以賓禮而不名  
賜以廩祿不煩以職郊祀必致燔肉撫勞甚至洪武三  
年春以疾告遣中使存問疾篤詔還公於家給驛以行

賜白金百兩文綺八端他錢物稱是三月廿八日次下  
邳新安驛薨於舟中壽五十有五希學奉喪歸以六月  
十三日葬於孔林去孔子墓若干步公寬厚樂易事親  
有禮遇族黨有恩與人交不為掩覆計度一以誠信豐  
下美髯容止甚都順帝以福人稱之公娶張氏濟寧路  
總管子仁女封魯郡太夫人丈夫子九人長即希學次  
希說希範希進希麒希鳳希順希尹皆元國子生希贊  
其季也女二人適某某孫男九人曰訥曰証曰某曰某

曰某曰某曰某曰某女五人希學今資善大夫龍  
封衍聖公每歲朝正於京師上寵錫之甚厚以袞渙狀  
來請曰先公沒今十年而墓道之石無文以刻恐休德  
不聞於來世人其謂何濂嘗獲識公且與希學善雖老  
矣其忍不銘銘曰

天命大聖為萬世師廓幽昭潛雨施日輝功加堯舜位  
則不有斂其遺澤以昌厥後歷年二千有興有亡五十  
餘世封君相望自侯而公愈遠彌貴桓圭袞衣肅將祀

事惟公紹家敦大且文人曰休哉聖師之孫入為秩宗  
左禮右樂格為幽明上下允若亂兵趨燕宗社震騫君  
臣合謀棄而西遷公曰不然君死社稷以正伐亂勝不  
以力王師煒煒如虎如貔盜遁難夷公實啟之關陝之  
間將驕胥噬彼謀不臧以水止潰公謂元戎世方興亂  
無失厥防以速其叛言臧不從不臧是為禍將迨身云  
何弗歸爾書迎拜俾掌邦教大訓宏謨敷聖之道土宇  
日隳位其可居退脩於家琴瑟詩書皇明御極取聖為

則陟降帝庭禮儀有翼生享其榮死篤其承云誰致然  
聖澤休明惟聖之澤如山如川有址有源以永厥傳繼  
聖惟賢守位惟德昭績垂聲後嗣是式

大明故中順大夫禮部侍郎曾公神道碑銘

有

序

治古之時非惟道德純一而政教脩明至於文學之彥  
亦精贍宏博足以為經濟之用益自童州之始習四經  
之文畫以歲月期於默記又推之於遷固范曄諸書豈

直覽之其默記如經基本既正而後徧觀歷代之史察其得失稽其異同會其綱紀知識益且至矣而又參於秦漢以來之子書古今撰定之集錄探幽索微使無遁情於是道德性命之奧以至天文地理禮樂兵刑封建郊祀職官選舉學校財用貢賦戶口征役之屬無所不詣其極或廟堂之上有所建議必旁引曲證以白其疑不翅指諸掌之易也自貢舉法行學者知以摘經擬題為志其所最切者唯四子一經之箋是鑽是窺餘則漫

不加省與之交談兩目瞪然視舌本強不能對嗚呼一  
物不知儒者所恥孰謂如是之學其能有以濟世哉此  
濂銘亡友曾公之墓憤激於中而復繼之永慨也公諱  
魯字得之曾其氏也孔門弟子郈公五十七代孫其居  
新淦吉陽里者已久世裔之傳與夫轉徙之詳昔以著  
於公之先墓茲不重載曾大父兼善宋贈大理評事祖  
天麒宋宣教郎軍器監主簿父順元韶州路儒學教授  
妣劉氏公年七歲能暗誦九經一字弗遺奉禮郎簡君

正理欲以神童舉於朝其父力止之及齒稍長取三史  
日記之尋及其餘數千年間國體治亂人材忠佞制度  
沿革咸能言之有叩之者如山川出雲層見疊敷杳莫  
察其端倪公殊不以為足所藏子集動至數百家各攬  
其精而掇其華聞有僻書隱牒不憚道里之遠必購得  
之既得必篝燈讀之達旦不寐發為辭章龐蔚炳朗毅  
然有不可奪之氣廬陵劉提舉岳申與之語連日夜不  
休嘆曰不意後生中能至於斯也其將以文鳴乎杜內



翰鄉之丈人行也公負笈從之游益充拓其所未至寤  
疑辯惑惟日不足遂以博極羣書稱於時公猶謂未要  
於至道述長書一通謁虞文靖公集於臨川虞公大悅  
曰昔程子與張敬夫年十六七即有志聖賢之道子能  
如是復何讓古人公年益十九矣由是益潛心濂洛關  
閩之學分別義理密如蠶絲牛毛而尤愛吳文正公澂  
之書吳公亦居臨川其著書滿家無大無小公一一訪  
獲之玩繹未嘗釋手久之充然有得盤桓林泉以道自

娛若將終身焉至正壬辰天下大亂州縣所在繹騷公  
召里諸豪集健兒持兵以保障乎一方仍椎牛醢酒開  
陳逆順禍福言甚剴切衆皆聳耳而聽卒無敢犯非義  
者人號曰君子鄉入國朝有詔纂脩元史勒成一代之  
典遣使者起公於家公贊決部居補苴罅漏者不一而  
足其功為最多史成上坐端門召諸史臣有白金束帛  
之賜公居其首焉公將乞身還山會朝廷開局編類禮  
書輿論以老成之士無踰於公者共堅留之議禮之家

有如聚訟自古難定於一公當羣言沸騰之中揚言曰  
某禮宜據某書則是從某說則非有不服者爭相辯詰  
公歷舉傳記答之各心醉而去俄遷入儀曹為祠部主  
事階承事郎時洪武二年十二月也常忠武王薨高麗  
王遣使來祭公索其文觀之使者靳不與公不可使者  
不得已出之外則襲以金龍黃帕內則不書洪武之號  
公責之曰龍帕固疑誤用若納貢稱藩而不奉正朔君  
臣之義果安在邪使者頓首謝過皆命易去之乃已安

南來貢主客曹已受其表將入見公取其副覽之其王  
乃陳叔明公曰前王陳日燧爾今驟更名必有以也亟  
白尚書詰之使者不敢諱蓋日燧為叔明所逼而死遂  
篡其位中心懷懼故託脩貢以覘朝廷之意上批之曰  
島夷何狡獪如此却其貢不受五年二月上問丞相曰  
曾魯在禮部今何職耶對曰不過主事爾即日超六階  
拜中順大夫禮部侍郎公以順字犯父諱辭就朝請下  
階吏部以國法有定不之許倭夷入寇戍將每捕獲之

上憫其無知命儒臣草詔歸其俘公之所撰有中國一  
視同仁之語上悅曰頃觀陶凱文已起人意今魯復如  
此文運庶其昌乎凱禮部尚書也八月奉旨考京畿鄉  
試入院之後忽吐血一升公猶力疾閱卷不息自是遂  
奄奄不振九月膏露降鍾山羣臣咸見諸咏歌公獨撰  
賦以進十月上將郊祀出宿齋宮命取諸作使侍臣更  
番誦之至公獨曰此魯魯作耶援據既精鋪敘有法豈  
新進之可驟至哉十又一月疾愈篤上章乞骸骨甚至

中書以聞上惻然許之十又二月辛卯歸舟至南昌公  
謂次子圭曰吾命只明日不能至家矣然吾以一介韋  
布之士受國寵恩位躋法從又得守正而斃死復何憾  
所憾者不見二孫之成立也即趣具觚翰為書戒之壬  
辰次石政潭果斂衽而逝距家纔兩驛爾丙申至故居  
丁酉具棺斂擇地於縣南屏山之陽以六年某月某甲  
子祔葬九世祖高安府君之塋從治命也公蓄德熙和  
人近之者溫如春風不見忿戾之色然其人則山澤之

癯身退然若不勝衣未嘗有所矯飾其處家也事親克孝父喪哀毀致疾踰年而後能起已而二兄諸姪相繼捐館公收淚經紀凶事三年間葬十餘喪且撫存其孤惇惟恐或失其所生平輕財仗義喜周人之急四方賓客日登其門公倒屣迎之了無倦容嘗一試江西鄉闈有司寘諸乙榜人為不平而公亦澹如也其出仕精白一心有知無不為凡典禮涉於制度者必經公損益而後定雖古者吏牘之繁簡署字之上下人所不能知公

獨稽諸書以為決公誠所謂濟世之學者非邪公屬文  
不喜留藁其徒雖有所輯錄猶未成書其自著書有六  
一居士集正訛南豐類藁辨誤藏於家他咸未脫藁當  
公修元史時濂實為總裁及入南宮又有僚友之好故  
相知號為最深共坐官舍更析互辯每至夜分嘆末學  
之空虛傷古道之寥落又復相視輒然一笑嚴陵徐尊  
生嘗有言曰南京有博學之士二人一以舌為筆一以  
筆為舌其意蓋指公與濂嗚呼尊生過矣濂也何人而



敢上儷於公哉雖然公未嘗欲棄濂也相期他日幸歸  
休必胥會焉共成一書庶可藉手以見前賢公今不可  
作矣故因銘墓之文而屢興懷於治古之時也世之讀  
者必將深感焉公讀書之室曰守約齋學者遂稱為守  
約先生享年五十四歲娶聶氏先二十年卒公再不納  
配一榻蕭然如山林枯槁之士人難之子男二人長塾  
今來請銘者次即圭出為仲兄後女一人應真適劉奉  
孫二人正龍夢龍銘曰

氣化糾纏人文昭宣萬類斯甄兮天設地施一偶一奇  
形聲相資兮載籍繽紛六藝攸尊各闢其門兮枝分葉  
敷散為千塗溷其精脩兮彌綸大邦文物采章有變有  
常兮不生碩儒孰軋其樞孰苞其腴兮玉笥之陽神珠  
吐芒莫自翳藏兮大明麗天束帛彋彋蒐羅俊賢兮袞  
袞鉞誅寓於策書輿論所孚兮儀曹之升議禮稽經日  
惟烝烝兮黼黻帝猷上窺殷周功在刪修兮所積之訖  
所發之深開陽闔陰兮正笏垂紳其色閭閻邦之老臣

兮媚學蹢躅其中枵然何翅霄淵兮天胡降喪一鑑之  
亡四國之傷兮其神上征化為列星寒光晶熒兮下射  
屏山馬鬣桓桓名在不刊兮

明文衡卷七十一

謹案卷七十第六頁後二行圖沁布哈舊作禿堅  
不花今改 八頁前七行布呼丹舊作寶忽丁  
今改後倣此 後三行哈迪爾舊作黑的兒今  
改 九頁後五行齊默特喇實舊作鐵木烈思  
今改


卷七十一第三頁後五行多爾濟舊作朶兒赤今  
改 五頁前六行多通舊作道童今改後倣此  
後一行鄂魯舊作奧魯今改 六頁後四行

實布沙舊作石八沙今改 七頁前一行奇濟

奇爾舊作吉居奇兒今改 十一頁後三行蘇

蘇舊作雪雪今改





總校官庶吉士臣張能照

校對官編修臣閔惇大

騰錄監生臣吳申嵐

欽定四庫全書薈要

集部

明文衡卷七十四

二至

詳校官候選知縣臣吳甸華



欽定四庫全書蒼要卷二萬二百二十五

集部

明文衡卷七十二

明 程敏政 編

神道碑

安定侯程忠愍公神道碑

朱善

初皇帝念癸卯歲南昌暨康郎山前後死節之臣追爵  
故萬戶程國勝安定伯與梁國公趙德勝濟陽郡公丁  
普郎等一體廟祀久之又定元功配享仁祖淳皇帝廟





庭諸外有廟食者亦皆賜謚加勲遣使者致祭有未備禮以葬者官為給之仍勅史臣勒功於神道之碑於是安定伯之兄吉輔以公嘗駐兵富陽愛其地而公族人之在杭者適獻兆於縣西長山之原乃自南昌遷匱而窆焉臣善謹奉詔上故贈開國輔運推誠宣力武臣榮祿大夫柱國安定忠愍侯事曰公諱國勝姓程氏世居徽之休寧初名元佐既從軍上改賜今名其先本陳鎮西將軍開府儀同三司忠壯公靈洗之後忠壯當侯景

之亂保捍州里有功其子散騎常侍威悼公文季死節  
於周父子廟食於徽號曰世忠威悼之後其顯於南者  
唐御史中丞歙州副統帥雲嘗起鄉兵拒黃巢有忠壯  
之風子南節居休寧陪郭甚盛其顯於北者唐六合令  
大辯徙中山再徙河南生明道伊川兩夫子靖康末子  
孫從渡江居池州再遷徽州陪郭之程互繼其絕譜牒  
具存可考也公曾祖榮秀仕元為江浙等處儒學提舉  
妣劉氏追封彭城縣君祖文貴宣義郎饒州路德興縣

銅冶場提領妣鄭氏封安人考社至正末用薦為承奉班都知不赴妣吳氏公生而英偉身長八尺美鬚髯見者知非常人方元政衰所在兵起公慨然思以自見於世乃與縣人俞茂婺源人汪同等團結鄉兵以拒寇亂歲丁酉天兵下徽州衛國公鄧愈發同與公等詣京師上大悅命同還守婺源而以公等從征伐衛公奏署公為總管府先鋒分兵與裨將李克魯等徇下方山諸寨是歲十月苗軍楊旺扎勒部兵十萬薄徽州衛公擇勇敢

士往當之咸推公公率百餘人橫戈鼓譟衝之衆皆辟  
易自相枕籍而統軍胡大海之兵適至因覆其營生擒  
其將胡辛等二百人楊旺扎勒僅以身免以功遷管軍總  
管戊戌正月從擊特穆爾布哈元帥營於婺源正兵方  
與之戰公率諸奇兵擣之遂殺特穆爾布哈俘士卒千  
餘人三月從攻嚴州道遇長鎬謝元帥軍戰却之遂拔  
嚴州五月僞吳張士誠與楊旺扎勒合兵犯嚴州公敗其  
舟師於東門追至大浪灘流矢中股引刀出鏃復戰勇

氣彌厲以功進領軍先鋒己亥五月從衛公畧浙西臨  
安大破張寇於閑林寨庚子七月鄱陽院判于光左丞  
俞椿擊走偽漢守將辛甲而據之衛公使公往說二人  
二人遂以饒州來附饒瀕鄱湖而偽漢主陳友諒方據  
江州數遣舟師來爭衛公與光椿連長營拒之令公結  
陣敵豐之後絕其歸路賊屢不得志乃引去八月領兵  
取浮梁偽參政鄧邦佐棄城走進趨樂平偽總管蕭乙  
率五千人營於險隘衆莫敢先登公以死士持挺魚貫

奮擊之奪其壁以入生禽萬戶彭壽等百人遂取樂平  
進攻江西十月衛公駐兵臨川之平塘時鄧克明據撫  
州遣使通款而實無降意公贊衛公卷甲夜趨比旦入  
其軍克明單騎遁去遂取撫州以功除管軍萬戶壬寅  
正月上親討友諒於江州友諒敗走公從衛公以兵會  
南昌分定屬邑癸卯四月有詔皇姪以大都督總諸將  
友諒益發境內兵以巨艦來攻皇姪分兵拒守公守寺  
步門寇犯之與戰虜其將一人寇兵奪氣而潰相拒凡

八十五日寇兵戴竹盾如箕進薄撫州門城壞三十餘丈衛公以火銃擊退之隨立木柵敵奮來爭且戰且築通夕城完公乃與牛海龍乘夜引兵劫賊營海龍為流矢所中以死公泅水得脫見上於金陵具言危困之狀上得公驚喜進陞萬戶上發舟師二十萬自將之令公率親兵宿衛帳下與友諒大戰康郎山友諒驍將張定邊奮前直犯御舟舟適膠淺公仗劒叱之急與帳前左副指揮使韓成水軍元帥陳兆先駕飛舸左右奮擊會

鄂國常公從傍射中定邊虢國俞公疾擢來援舟進水  
湧御舟遂脫而公等反遶敵艦之後援兵不接力戰死  
之時七月戊子也上聞為之撫膺大慟親為文以奠焉  
公春秋僅三十有一配汪氏亦死於難追封安定侯夫  
人公平生喜讀書慕節義居家孝友凡運籌決勝之方  
不學而能每戰踴躍率先赴敵矢石交下意氣自如堅  
城名寨身至力取一軍無不下之者上悉其名故有賞  
賚錦衣名馬必先一軍嗚呼癸卯距今益二十五年矣



當草昧之時羣雄角逐雖天眷真主畀之爪牙宣力之  
臣以佐大業而公等委身効命之死不悔卒之勲載盟  
府與古英烈之士儷美齊名其高識絕見則亦有非偶  
然者矣仰惟皇上獎忠酬勲度越前古恩禮之頒不一  
而足又將次第討論舉行世祿之典書之簡牘垂之後  
昆實足以勸千萬世為人臣者乃序其事而繫之以銘  
銘曰

巍巍我皇天錫神武龍興江淮以復平土南征北伐拯

世之屯貔虎之臣疏附駿奔有偉程公萬夫之勇世忠  
之孫不震不竦維時江浙莽為盜叢大旆東來仗劍以  
從始佐元戎有聲幕府遂督偏師孰敢予侮苗軍鷁張  
暨彼長鎬公出戎行其鋒莫當嚴底平饒撫亦下艖  
艚蔽江牙旗載馮西徇臨安以蹴偽吳遏彼楚蠻以殿  
鄱湖皇念公勲顯有大賚玉馬錦裘異爾諸帥維是楚  
蠻反道不共窺我豫章如蠆如蜂維公誓言廓清江漢  
不與賊生背城以戰維皇討賊耀兵江干公在扈行左

右橐韃敵兵來乘勝負未決死捍御舟勢孤援絕大星  
曉隕江水夜悲烈夫介士駢首於危馬革之忠哀動宸  
極親奠以文賜之廟食載念艱虞死者如生爰妥其靈  
官治其塋褒功有爵獎忠有謚匪榮一時以勸百世墮  
有衣冠公始蓋棺英魂儼然玉帶貂蟬墓有享堂公在  
中寢四時承嘗來食來飲富陽之山鬱鬱松楸成公之  
志奠此高丘神道有碑龜趺螭首史臣勒銘永詔厥後  
大明勅賜開國輔運推誠宣力武臣征西左副

將軍濟寧侯追封滕國公謚襄靖顧公神道碑

劉崧

自昔國家興王之地必有才武雄傑之士出於其間以  
贊立大功佐成大業為國虎臣享有祿位豈非天人交  
會之應哉故征西左副將軍濟寧侯顧公名時字時舉  
世為臨淮人曾祖千四府君以公貴贈鎮國將軍僉大  
都督府事護軍追封睢寧縣子妣王氏封睢寧縣子夫  
人祖文俊累贈驃騎將軍都指揮使護軍追封武陵伯

妣林氏封武陵伯夫人考道祥累贈榮祿大夫同知大都督府事柱國封濟寧侯妣雷氏繼潘氏俱封濟寧侯夫人公志氣倜儻勇於有為元末政隳海內大亂皇上龍興淮甸思濟天下公以同里率先來附披堅執銳常侍左右自歲甲午起兵西拔和州東渡大江凡擊叛討逆開疆拓境靡不率從始由百夫長轉陞元帥尋同知天策衛親軍指揮使司事繼調濠梁衛丙午詔與東平侯韓政取濠州破四門月城拔之洪武元年戊申從大

將軍魏國公徐達北定燕薊拜驃騎上將軍副大都督  
府事兼同知太子率府事三年庚戌論功行賞進號開  
國輔運推誠宣力武臣階榮祿大夫勲柱國職同知大  
都督府事爵濟寧侯食祿一千五百石賜以鐵券使子  
孫世襲焉明年辛亥授征西左副將軍由興元取四川  
入階州擒其梟將王進克文州綿州擊向家營寨破之  
又克漢州進圍成都偽夏丞相戴壽等望風款附比師  
入重慶其主明昇出降四川平五年壬子仍左副將軍

從征虜前將軍曹國公李文忠等分道入沙漠與大將  
軍期失道會糧且盡士卒不能戰公奮引麾下數百人  
躍馬大呼衝薄部落戰敗走之遂掠其輜重羊馬而還  
軍勢復大振七年甲寅從魏國公總各衛兵出鎮北平  
益築堡障練士伍繕甲兵廣牧畜雖邊隅日靖晝夜從  
幕府吏深計遠筭常若寇至明年乙卯詔還尋有旨從  
魏國公仍出北平十二年己未秋遽遘奇疾藥弗能愈  
以是年冬十一月二十一日薨享年四十有六訃聞上

為之震悼輟朝二日明年庚申春二月己卯公喪歸自  
北平舟行數千里迎祭填道觀者感歎敕賜葬鍾山之  
陰上親為舉奠復立誌文以賜之明日詔贈特進光祿  
大夫左柱國追封滕國公諡襄靖其始終榮寵可謂異  
數矣配李氏封濟寧侯夫人今封滕國公夫人子男四  
人長曰敬金吾前衛後千戶所鎮撫次曰英曰華曰苟  
爾女二人既葬其孤敬泣而請於朝曰惟先臣事上二  
十餘年不幸蚤終顧神道之石銘文未勒敢援故事以



請於以見聖朝眷待之厚且以慰先臣於地下也於是  
禮曹以為言詔可其請命禮部侍郎臣崧為之銘臣崧  
職在討論不敢以蕪陋辭謹狀次而書之且系以銘曰  
聖人受命萬物咸覩乘時佐運各奮其武矯矯襄靖生  
於帝鄉帝猶龍飛雲從之翔自淮渡江首定建業公時  
左右執俘獻捷領兵東向遂夷月城電擊颶馳濠梁以  
清北收燕薊旋拜驃騎崇勳豐祿鐵券以誓乃命西討  
進自漢中取道階文山巉水漲進圍成都作氣一鼓千

夫投戈俘厥孱主既從征虜北度陰山擁槊奮呼出其  
險艱薄衝部落免脫鵑擊掠其牛馬還給軍食主將上  
功帝憫爾勞四方既平汝弓其橐橐弓戢戈北守燕薊  
嚴其扃鐃式謹邊事灑水茫茫居庸閑閑馬絕南牧城  
無晝闕公歸末期遂以訃告沿邊驚呼當宁嗟悼襄靖  
有謚滕國有封茅土新疏沛豐舊庸闡績著銘爰勒神  
道榮光自天天子有詔

大明敕賜開國輔運推誠宣力武臣征南副將

軍靖海侯追封海國公諡襄毅吳公神道碑銘

洪武十一年戊午前征南副將軍靖海侯吳禎奉詔出  
定遼是秋以疾聞上遣醫馳驛視之弗能愈遂輿疾還  
京車駕幸其第問勞有加明年己未五月疾革以其月  
二十有六日薨訃聞上為之震悼輟朝二日詔贈特進  
光祿大夫左柱國追封海國公諡襄毅仍賜窆鍾山之  
陰俾官給其事葬之日車駕臨奠加贈賻焉又明年庚  
申上追念其勞爰敕儒臣禮部侍郎臣崧撰文刻諸神

道之碑以昭不朽臣崧奉詔不敢辭乃追考公牘紀載  
第而書之謹按公初名國寶後賜名禎字幹臣姓吳氏  
世為濠之定遠人自少時已卓犖有膽畧及天下大亂  
從上起兵里中即能知天命有在與兄江陰侯良俱隸  
麾下悉心委事焉自歲甲午乙未西克滁和東渡大江  
揚威振銳所向無敵由帳前都先鋒為總管陞建興翼  
院判轉分院元帥尋為天興右翼副元帥與良同守江  
陰每寇至輒擊走之首破偽吳張士誠水寨擒其梟將

朱定甲辰授英武衛指揮使丙午寇出馬馱沙上親督  
戰追至巫子門寇乘潮逆拒首尾相失公縱兵急擊之  
俘獲無算是秋從大將軍魏國公徐達率馬步舟師由  
港口取湖州公勒奇兵出舊館扼之戰以大捷事平遂  
留戍焉吳元年丁未九月復從大將軍攻圍蘇州連破  
胥封二門士誠就執公奉令撫循秋毫無所擾進僉大  
都督府事時方國珍據明州未下上以公為征南副將  
軍從御史大夫信國公湯和往平之公引舟乘潮夜入

曹娥江夷渠通道出其不意直抵車厰會降者言方氏  
已潛挈家入海公領兵追於盤嶼與合戰自申至夜三  
鼓敗之盡獲其戰船人馬輜重而還未幾國珍降有旨  
由海洋進取福州不數日奄至城下圍其西南水部三  
門一鼓克之時偽平章陳友定據延平作亂明年洪武  
元年戊申進破延平擒友定閩海平公歸次昌國會海  
寇葉陳二姓聚劫蘭秀山公調兵立勦之三年庚戌朝  
廷定功行賞進開國輔運推誠宣力武臣榮祿大夫柱

國吳相府左相靖海侯食祿一千五百石賜以鐵券使子孫世襲焉五年壬子詔大發兵東戍定遼命公總舟師數萬由登州轉運以餉之海道險遠人用難虞公調度有方兵食充羨折衝風濤如履四達尋召還七年甲寅海上警聞公復領沿海各衛兵出捕至琉球大洋獲倭寇人船若干俘於京上益嘉賴之常往來海道總理軍務至是歸自遼東而疾作不起矣公生以天曆戊辰六月二十一日葬以薨之閏月十三日享年五十有二

曾祖三七府君贈鎮國將軍僉大都督府事護軍追封  
潁上縣子妣周氏追封潁上縣子夫人祖十一府君贈  
驃騎將軍都指揮使護軍追封延陵伯妣劉氏追封延  
陵伯夫人考似龍府君贈榮祿大夫同知大都督府事  
柱國追封渤海侯妣葉氏追封渤海侯夫人配李氏封  
靖海侯夫人子男五人長堅西安護衛鎮撫側室陶出  
也次忠羽林左衛鎮撫夫人李出也次端次洪五十皆  
庶出女十人其第五女許為湘王妃尚在室惟公以驍



勇之才際興王之會鍾英淮甸立勲遼海致位公侯而  
不矜不伐盡瘁所事真古之名將哉是宜銘銘曰

赫赫景命大明當天帝業所基公侯出焉桓桓吳公有  
侂其勇顧瞻在廷玉立山聳元政不綱帝憫下民爰揮  
天戈掃除妖氛始克滌和旋拔采石飛渡大江曾不終  
日公時在行兄弟齊一莫不率從干城是力帝命汝禎  
言守江陰鄰敵授首遠人歸心南收丹陽東畧無錫建  
興策功英武躋職寇窺海口縱兵擊之風從潮生彼逆

不支從攻吳興機畧周布捷出舊館扼其歸路進拔封  
門東定姑蘇擒厥大酋獻於京都帝念爾勞陞秩督府  
不曰四明亦肆違拒遘厲戈甲往貳征南挾潮而飛颺  
旗電帆撻金伐鼓壁其城下寇窮而逋膽落萬馬躡景  
追風執訊凱旋鯨奔鯢伏海濟雲鮮張方告平閩海方  
急千艘南馳殲彼勁敵三山既隳延平遂通麾旄所指  
列郡來同公歸自南蘭秀連梗鋤而闢之海道晒晒帝  
曰靖海實汝之功茲命汝侯往承其恭煌煌鐵券翼翼

命秩思延子孫功翼王室載授征虜督餉定遼白粲連  
雲颶風不搖倭童跋扈出沒大洋爰獸獮之皇威以張  
茫茫遼海烈烈英勇式弘將畧茂對天寵方召元老曹  
周世庸氣應德符千載一逢維天祐賢公宜永福何疾  
之嬰遽此不淑儀曹考行贈謚有光鍾山佳城天設地  
藏神道之左有石嶷嶷儒臣作銘昭示無極

明文衡卷七十二

欽定四庫全書薈要卷二萬二百二十六

集部

明文衡卷七十三

明 程敏政 編

神道碑

大明勅賜故開國輔運推誠宣力武臣特進榮  
祿大夫右柱國衛國公追封寧河王諡武順鄧

公神道碑

朱夢炎

洪武十年冬十有一月初九日開國輔運推誠宣力武

臣特進榮祿大夫右柱國衛國公鄧愈自河州召還至  
壽春以疾薨訃聞上哭之哀為輟朝三日詔追封寧河  
王謚武順其月十九日柩車至三山門車駕臨奠且親  
視其葬地而舊塋在鳳臺鄉者狹隘弗稱上乃徧覽傍  
近岡阜擇于城南西山之原寬平爽塏勅有司營建墓  
兆仍命遷王母夫人及弟昇之喪同葬焉凡喪事所須  
皆官給之恩至渥也上猶念其功不已召臣夢炎等于  
廷諭之曰愈事朕二十二年東征西討勤勞至甚歷鎮

八州有功無過爾其撰文刻之石以昭不朽臣謹按公  
牘所載賜名愈泗州虹縣人三世弗仕以王貴曾祖父  
大公贈資善大夫中書右丞追封臨淮伯曾祖母孟氏  
追封臨淮伯夫人祖父大公贈榮祿大夫中書平章政  
事柱國追封南陽侯祖母戚氏追封南陽侯夫人父諱  
順興贈特進榮祿大夫大都督府右都督右柱國追封  
衛國公母張氏追封衛國公夫人王生而魁偉幼有大  
志勇力過人元季壬辰天下雲擾王父衛國公起兵于

鄉遂戍臨濠與元兵戰死之王兄友隆代領其衆未幾

友隆病卒衆推王領軍事年方十六王出戰必挺身破  
敵軍中咸服其勇歲乙未上駐師滁陽王自盱眙率所  
部來附克管軍總管其年夏六月從渡大江克采石取  
太平繼而元將曼濟哈雅以舟師扼采石陳額森合兵  
數萬逼城下上親督兵禦之調王與魏國公以奇兵出  
其後大破之生擒陳額森丙申三月定金陵拔漂水破  
鎮江王皆與有功陞元帥出守廣德冬十有一月長鎗

謝元帥率衆來寇王出城奮擊俘其總管武世榮及軍士一千餘人丁酉三月轉行樞密院判移戍宣州七月領兵取休寧績溪乘勝克徽州元將敗走十月浙江苗楊元帥率衆十餘萬來攻城時徽州新附城郭未完守禦之器未備王激厲將士明立賞罰與越國公胡大海等分門並出奮兵力戰大敗其衆生擒部將胡辛等一百五十八人賊衆奔潰婺源元汪同僉領兵來降戊戌正月擊破特穆爾布哈元帥寨斬首五百餘級追至婺源



源東門擒殺特穆爾布哈獲士卒三千餘人遂克婺源

三月取嚴州四月攻淳安縣賊帥余子珍敗走獲馬一

百餘匹降其頭目軍士三千餘人遷同僉樞密院事五

月浙江苗楊復率衆屯徽州烏龍嶺拒却之九月轉僉

書行樞密院事己亥正月領兵畧浙江臨安大敗張寇

于閑林寨庚子七月鄱陽院判于光右丞余椿擊走偽

漢部將辛同知取饒州遂以其城來附有旨命王往鎮

之饒濱彭蠡湖而偽漢主陳友諒尚據江州數遣舟師

來攻城王斂兵東門外與余椿于光等連營以拒之屢  
殲其衆賊兵遂退辛丑正月除江南行省叅政仍兼僉  
書行樞密院事總制各翼軍馬饒之境内弄兵者尚懷  
疑阻王推誠結納撫以恩信于是左丞吳宏等皆請降  
八月領兵襲浮梁偽叅政侯邦佐棄城遁八月取樂平  
擊敗蕭總管五千餘衆擒萬戶彭壽等六十八人饒境  
悉定進取江西十月駐兵于臨川之平塘時鄧克明據  
撫州遣使通款而實無獻城之志王知其情卷甲夜趨

比旦入城克明單騎遁翼日遣人以分省印來獻王號  
令嚴肅秋毫無犯江右之民室家相慶爭持牛酒迎勞  
王悉却而不受是時上親討偽漢主陳友諒于江州友  
諒敗走遂下江西命王以步兵來會車駕至南昌有旨  
授王江西行省叅知政事留鎮之時壬寅正月四日也  
癸卯夏四月陳友諒悉國內之兵圍江西江水暴漲寇  
舟直抵城下王與諸將協謀固守屢挫其鋒賊勢大沮  
相持者凡三月會上親率援兵至湖口友諒懼而退大

戰康郎山友諒竟死甲辰三月新淦土豪鄧青叛以卒  
二萬人據永豐王調兵破之擒首賊胡理問劉石等五  
十一人八月從開平王平臨江之沙坑麻嶺十洞諸山  
寨合兵圍贛州降之南安南雄韶州皆送款乙巳正月  
進江西右丞加湖廣行省平章出鎮襄陽西抵巴蜀北  
控河洛烽火相望新附之民未有定志王撫而鎮之民  
懷其惠軍忘其勞遐邇悅服吳元年十月擢拜御史大  
夫洪武元年命大將軍經畧中原而以王為征戍將軍

征取江淮未取州郡三月攻唐州克之又取南陽生擒

蔡國公史克新等二十七員軍士一千五百人馬一百

五十匹七月克隨州右丞王誠降九月進攻洪山老馬

劉寨夜四鼓斬關而入擒殺甚衆冬十有一月率兵討

蜀河莽張獲之金商均房之境悉定三年命王為征虜

左副將軍平隴右大敗王保保于定西招諭河州土蕃

諸酋元帥何索諾木布哈鄂爾濟等皆納印請降于是

河州以西朶甘烏斯藏等部來歸者甚衆冬十有二月

定功行賞特封衛國公食祿三千石賜以鐵券五年命  
王為征南將軍討澧州等處溪洞蠻夷平之九年吐蕃  
所部州城邀沮烏斯藏使者掠其輜重有旨命王為征  
西將軍往討之十年王與副將分所將兵為三併力齊  
入覆其巢穴窮追至崑崙山斬首不可勝計獲馬牛羊  
一十餘萬上嘉其功遣使召還未至薨王以元後至元  
丁丑二月十五日生享年四十有一兄弟三人長即友  
隆弟昇仕至羽林衛指揮僉事先王五年卒夫人曹氏

側室王氏徐氏子男五人長鎮羽林衛鎮撫次銘次鐸

次銓次太平奴皆庶出女四人長女夫人曹氏出也為

秦宮妃次適河南護衛指揮周巖餘尚幼孫女一人王

之葬也以是年十有二月二日丙午惟王器量宏偉而

沈毅簡重謙恭慎密而奉公守法臨大敵而不懼有大

功而不矜又能禮賢下士寬惠愛人廣德宣州徽嚴饒

撫南昌襄陽八州之民至今猶懷其德事母夫人能致

其孝撫弟幼孤能致其愛蓋不獨將畧之雄兼有君子

之行宜乎為國元勲光輔帝業而膺聖眷之隆者也謹  
再拜稽首而為之銘曰

聖皇受命地闢天開掃清六合鼓舞羣材惟武順王雲  
龍風虎擇君來從誓以身許飛渡大江奮戈前驅斧堅  
摧鋒何敵不除一舉姑孰再舉建業颺馳電掣百戰百  
捷玉節飛雲金戈凜霜有赫其威往往征羣方乃輯浙東  
乃撫江右大閩煌煌厲我城守孰謂狂豎而敢馮陵自  
速厥辜江漢底平帝用有嘉平章湖廣駐節荆南爰資



開蕩化仇而恩循暴而柔以德輔刑澤及八州武功告  
成四海一統爵以上公受天之寵烈烈征西極討窮追  
殲彼大憝張我皇威名還有效期中道而逝九重痛悼三  
軍隕涕念王之忠開拓建功念王之德無忝始終何以  
報之王封是錫哀衣繡裳光賁泉宅西山之原墓門有  
石視此刻銘永錫無極

大明開國輔運推誠宣力武臣榮祿大夫柱國  
同知大都督府事江陰侯追封江國公諡襄烈

吳公神道碑銘 吳伯宗

洪武十四年十一月二十六日開國輔運推誠宣力武  
臣榮祿大夫柱國同知大都督府事江陰侯吳公以疾  
薨于青州十二月訃聞皇上為之憫悼輟朝三日詔所  
司定贈諡加贈特進光祿大夫上柱國中軍都督追封  
江國公諡曰襄烈遣使者迎匱以歸洪武十五年二月  
丙子賜葬鍾山之陰上念其功不已命詞臣撰文勒諸  
豐碑以垂不朽伯宗職居翰林屬當執筆謹叙而銘之

公諱良姓吳氏鳳陽定遠人初名國興後賜今名氣岸  
雄偉性質剛直與弟禎俱以勇力稱元末羣雄並起海  
內鼎沸皇上以聰明神武仗大義奮起布衣公兄弟委  
身相從服勤左右上深器焉甲午秋從上取滁州乙未  
春從克和陽常為先驅戰皆有功六月從渡大江與元  
兵戰于米石拔其營乘勝克姑孰尋下溧水溧陽丙申  
從定建康戰功為多又從今大將軍太傅魏國公徐公  
達克鎮江下常州屢著功勤歷陞軍職丁酉下江陰命

公以指揮使領兵鎮守時偽吳張士誠據姑蘇跨有淮  
東浙右地大物衆兵食富强實江南一勍敵而江陰正  
當東南要衝喉襟之地士誠又多變詐動以金帛啗誘  
將士公行上諭之曰彼以其詐我以吾誠爾為邊將慎  
守封疆約束士卒毋外交毋納逋逃毋逐小利毋與爭  
鋒惟保境安民而已公奉命惟謹繕城池遠斥堠利器  
械嚴部伍士卒無敢逃亡無敢出境生事者敵亦畏公  
之威不敢侵犯數年上親將兵下江西克湖廣平偽漢

陳友諒大軍屢出而無東顧之憂者以公之扞蔽也丁未大軍克姑蘇士誠面縛上以姑蘇承士誠割據之餘力戰乃服必得剛毅有智畧者鎮其地遂以命公公至奉宣皇上盛德紀律嚴明號令整肅軍民輯睦咸得奠安洪武三年天下大定論功行賞以公有守江陰之功封爵為江陰侯食祿一千五百石賜以鐵券子孫世襲恩至渥也廣西右江諸州僻處炎徼去中國遠數千里前古號為要荒乍臣乍叛唐宋以來羈縻而已元都北

方相去益遠姑息尤甚夷俗狃于仇殺數侵盜邊境五  
年春命公將兵討之公率兵深入跋履崇山踐歷險阻  
剪除荆棘衝冒瘴霧勤勞特甚數月盡平其地俘獲不  
可勝計自是溪洞夷獠畏威懷德革心向化輸租賦奉  
法令同內地焉先是上稽古制建親王為磐石藩屏齊  
王受封青州命公營建王府宮殿社稷公經營區畫部  
署軍卒並手偕作功成而民不知勞公留青州二載得  
疾而薨享年五十有八公自起身行伍至為將帥受封

爵始終一致有功無過故其薨也上深惜之恩禮有加  
焉公存時以公貴推恩三代曾祖三七府君贈鎮國將  
軍僉大都督府事護軍追封潁上縣子妣周氏追封潁  
上縣子夫人祖千一府君贈驃騎將軍都指揮使護軍  
追封延陵伯妣劉氏追封延陵伯夫人考似龍府君贈  
榮祿大夫同知大都督府事柱國追封渤海侯妣葉氏  
追封渤海侯夫人配高氏封江陰侯夫人子男二人長  
曰高神策衛試指揮使次曰壽安女三人在室公弟禎

亦以勲封靖海侯追封海國公先公三年薨嗚呼古今  
豪傑之士際風雲之會攀龍附鳳竭忠勤樹勲烈以名  
世者多矣未有如公兄弟同遇聖朝同立大勲同膺高  
爵輝映赫奕若斯之盛者也是宜勒諸貞石以光前古  
傳後世而垂無窮豈止照耀泉壤而已哉銘曰

天啟洪運大明肇興豪傑率從霧擁雲蒸桓桓吳公剛  
毅英烈異才間出萬人之傑天戈義旗飛渡大江爭先  
鼓勇敢莫敢當既定金陵亦下京口公俱在行厥績多



有江陰崇墉東南要衝屹若砥柱維公之功姑蘇新附  
命公綏靖紀律嚴明大小從令炎荒僻遠命公徂征歷  
代羈縻慕義來庭功成汗馬名載竹帛兄弟二人並著  
開國河山賜誓列侯疏封慶延後嗣與國無窮生榮死  
哀富貴終始進爵上公賜諡且美鍾山之陰有碑穹然  
勒銘紀功何千萬年

皇明開國輔運推誠宣力武臣榮祿大夫柱國  
西平侯追封黔寧王諡昭靖沐公神道碑 王景

皇明以神武定四方混一區宇懋德禋祀東漸西被罔  
有內外時則有若貔虎之士翊運之臣汎掃爬梳用能  
咸和天休以集大命草昧之初各奏爾功歸于有德也  
至于內託肺腑而建丕績者則成于天地涵育之功也  
是以一舉而開閩關大業闢矣再奮而運斗樞大政立  
矣三厲而西畧自西徂南大統一矣翊亮之功昭茲甚  
明此皇上之所以始終垂眷大有造于黔寧也王諱英  
字某姓沐氏鳳陽定遠人元季天下難作王在童稚喪

所怙鞠于母氏母氏復物故時皇上龍飛鳳陽往拜于門上奇而育之賜國姓既長機敏過人數從征伐終日侍側無戲色亦無惰容弘量孝恭出于天性上益奇之滋欲試以事壬寅授帳前都尉出鎮鎮江焯有聲績甲辰除廣武衛親軍指揮使軍府肅然尋加昭勇大將軍廣武衛指揮使軍府益律戊申春正月上即皇帝位改元洪武既定鼎命王從征福建擒元平章陳友定三月復王姓鎮建寧三郡三年陞鎮國將軍僉大都督府事

四年陞榮祿大夫同知大都督府時天下兵樞交壅治  
出聲生稱上意旨中宮尤屬望焉九年乘傳繇陝右抵  
熙河布德澤康遠人事有不便更張以聞明年副寧河  
王總大兵征蕃部西渡黃河畧川藏耀兵崑崙轉戰千  
里俘虜萬計班師論功封西平侯開國輔運推誠宣力  
武臣階仍舊榮祿大夫勲柱國食祿二千五百石賜鐵  
券又明年八月拜征西將軍將兵征西蕃降元萬戶且  
實勒戢三副使松多爾濟鄂溫都爾人卒二萬雜畜二十

餘萬是行平朵甘納琳七站地數千里十三年以陝西  
兵征和林元國公托和齊等畧額齊訥渡黃河回賀蘭  
涉流沙偵騎報去穹廬五十里王分為四翼自以驍勇  
衝其中堅銜枚夜薄其營生擒托和齊知院阿租全部  
皆降明年領軍從大將軍出古北口襲公主山長寨平  
四郡過驢駒河虜知院李宣還京副征南將軍統兵征  
雲南繇辰沅出羅鬼攻普定下之攻普安又下之轉戰  
而前元梁王巴咱爾斡爾密以司徒平章達爾瑪軍曲

靖會大霧咫尺不辨壓白石江兩軍相望征南欲濟王  
曰我軍遠來利在速戰然衆未集不若以計破之乃陳  
兵陽若渡者遣奇兵從上流濟草山出其陣後為疑兵  
元軍見之陣動王麾軍泅水渡元軍亦卻陳我師既成  
列鎧仗鮮明彼皆奪氣遂大戰自旦至晡蹀血震蕩王  
從鐵騎撞之出而復入生擒達爾瑪于淖元兵遂大潰  
僵尸相屬乘勝蹙之勢若拉朽梁王棄城走死之收其  
金寶撫乂其民列衛布守諸郡皆納款惟大理不下王

率兵攻之段世據龍尾關關險王分一軍夜從間道登  
點蒼山襲其背黎明王策馬亂流攻關關不守至城前  
後受敵擒世拔其城會川永昌皆平間使下車里下緬  
不浹十辰雲南底平夏王與征南分兵東平烏蠻餘寇  
諸部謂王師東下復叛夷兵二十餘萬圍雲南四十餘  
日王以鐵師萬人馳掠之虜聞拔營夜遁時曲靖永昌  
皆失守王次第復平之事聞詔征南班師王留鎮焉二  
十一年春平摩沙勒斬首千餘級三月思倫發以三十

萬寇定邊東川廣西往往遙應之王率軍三萬禦之期  
日合戰至期分軍為三蠻以象乘高撞我右軍右軍少  
却王下令曰却者斬左軍與之鏖中軍右軍夾攻之聲  
震山谷蠻酋刀斯郎斃于象蠻師大奔斬首無算俘萬  
餘人盡獲其軍實思倫發遂降秋七月東川平冬十月  
廣西平誅者滿矣情俘五千餘明年平越叛阿資冬朝  
京師錫宴奉天殿賜金銀楮幣繒絲以萬計尋還鎮上  
慰曰爾在雲南朕無南顧憂二十四年阿資復叛王親



擊之阿資僅免有詔命王還鎮以僉都督何某為平羌將軍代統其兵討之阿資來降秋遣使招八伯八伯來貢八月錫土田明年夏六月某日王立廳事忽仆于地侍者扶入曰我中風不能起受皇上厚恩不能報矣遂薨時年四十又八軍民罷市巷哭訃聞上哭之慟輟朝制文遣禮部往祭命其子椿以喪歸塋發軍護送所至百司祭于道十月戊午王喪至自雲南上遣中使往祭明日追封黔寧王謚昭靖賜葬于江寧長泰鄉觀音山

時某年某月某日也勅百官郊送比葬上諭祭者三皇  
太孫親王遣祭者再部府諸司祭者一曾祖考某祖考  
某父某並追封黔寧王曾祖妣某氏祖妣某氏妣某氏  
並追封黔寧王夫人明年塑像功臣廟勅太常祀以太  
牢凡葬費皆給所司不煩其家雲南民夷請立廟守臣  
以聞制曰可初娶馮氏故追封潁國公國用之女先王  
卒追封黔寧王夫人再娶耿氏故贈長興侯某之女子  
男五人曰椿馮夫人出也上賜以名由後軍都督僉事

襲爵西平侯今鎮雲南孝友忠勤民夷悅附以兵梟越  
叛阿資威震諸夷可謂能繼王之志矣曰某耿夫人出  
也僉後軍都督府事曰昌曰景曰昂側室出也女四人  
孫女二人夫天地之道尚孝而右忠帝王之政褒德而  
顯功王在鎮之二年中宮皇后薨水漿不入口三日斬  
衰哀臨終喪三年皇太子薨喪毀逾禮因以成疾孝足  
稱矣初蒞督府以大學有正心之要綱目得春秋之旨  
太極圖明天人之道出師陳情表著忠孝之實終身披

誦不輟家事治而事上必本于忠勤在鎮之日侍衛不  
過數十人德可徵矣其馭軍也敵攻無堅城守必飭從  
征討則效忠獻謀搴旗斬將及為戎首則神機橫發出  
奇制勝功出漏刻有古良將風功可尚矣其為理也弘  
毅寬裕招納賢士長駕遠馭恩威兼下墾田至五十七  
萬畝而軍實克連歲用師小大戰數十而軍士豫附忠  
可見矣嗟乎忠孝昭于身天下仰其光功德著于時天  
下被其澤王之事上有子道焉有臣道焉上之撫王有

君道焉有父道焉非他人為君臣者並也生榮死哀可謂宜矣銘曰

聖皇啓運受命自天王氣浮淮有開必先暨暨將臣天挺神武鼓盪風雲闔闢寰宇五神闡珍挺生異人依光日月下上星辰風雲景從發迹海邦遂荒其區遂搯其吭沈沈樞府我寵居之秩秩皇猷我儀圖之載敷恩澤西涉渭源載敷國威西上崑崙賀蘭之墟流沙之阻兵不頓刃霆驅星昴茫茫井絡氣交神州載清載夷投鞭

斷流式遏王誅自爾南夷日月出矣爝火何施天兵一  
麾仆山摧壑封其鯨鯢以示大僇頌頌其城大燾高牙  
萬方攸同六合一家布德施威一紀是釐習爽闇昧莫  
不惠來皇帝曰咨予嘉乃績黃金大帶龜判琮璧鈞天  
無人陟帝左右帝曰嘻哉朕心曷究追王黔寧錫北京  
畿以享以祀以介繁禧推尊王爵上及三世澤逮漏泉  
無幽不屆子孫繩繩世有封爵允忠允孝以永天祿觀  
山之原神道有門刻銘貞石以勒殊勲

明文衡卷七十三

欽定四庫全書薈要卷二萬二百二十七

集部

明文衡卷七十四

明程敏政編

神道碑

勅贈開國輔運推誠宣力武臣榮祿大夫柱國  
同知大都督府事六安侯許國襄簡王公神道  
碑銘劉三吾

許國襄簡公既葬有年洪武之二十年冬十有一月己



亥皇帝御奉天門以工部奏公墓隧之石已具勅翰林  
學士院為文賜其家俾鑱焉臣三吾職在紀述不敢控  
詞則退而稽其世次官代行事之實序而銘之臣聞天  
生聖上聰明時人當元政秕僻寓內幅裂羣雄角起資  
以君主治其爭亂則有熊羆之士不二心之臣若徐常  
兩王佐命討伐襄簡許國公秉義效順以會其成功大  
一統之業者亦天所畀予者哉公姓王諱志世鳳陽臨  
淮人性鷙猛有智謀臨陣對敵果毅無前至正壬辰三

月土寇蠭起舉鄉兵取濠州且守且戰甲午前克滁州  
勢劇破竹知天命攸歸在今上疏附來從乙未濟江得  
米石太平破中丞曼濟哈雅水寨進拔建康丙申七月  
調隸總兵同簽樞院徐中山圍常州屢騰柵先登身犯  
矢石功聞授懷遠大將軍右副元帥丁酉三月常始下  
公功為最後恢復宣州江陰宜興高郵等州府多著戰  
績中山悉其能公克摠其智勇故也辛丑秋九月侍上  
親下安慶諸郡邑壬寅夏四月復隸中山身先馳戰江

西諸州縣望風崩角癸卯八月乘海艘從御舟蹙陳友諒于彭蠡友諒中流矢死擊走其餘黨于注口之水寨甲辰三月上親征湖廣武昌公暨諸將一稟睿算與賊連戰遂下之載從中山復廬州拔安豐逐北姑蘇張士誠軍陞飛熊衛親軍都指揮使總兵守禦六安州明年春改授六安衛指揮使戰守嚴綏敵驚民附戊申春正月上正宸極國號大明改元洪武其夏五月奉旨將本衛兵征迤北次汴梁尋調征河南冬十月從馮勝宋國

公渡黃河迤邐進取懷慶澤潞等府州往往所部直前  
無堅陣是臘徙鎮平陽居三年移守漢中仍駐師陝西  
明年將其全軍深入察罕諾爾絕塞却敵遠遁還軍平  
陽冬十一月勅贈開國輔運推誠宣力武臣榮祿大夫  
柱國同知大都督府事封六安侯五年從中山征朔漠  
大獲捷而還九月又從傅友德今潁國公征雲南所向  
克捷十七年凱還京師十九年八月十七日以疾薨于  
第上為之震悼罷朝賻贈有加追封許國謚襄簡公生

元統乙亥正月九日春秋五十有二以薨之十月二日  
勅葬鍾山之陰曾祖考四一公鎮國將軍僉大都督府  
事護軍追封羅山縣子妣董氏追封羅山縣子夫人祖  
考五一公驃騎將軍親軍指揮使護軍追封太原伯妣  
甯氏追封太原伯夫人考六三公榮祿大夫同侯妣潘  
氏追封六安侯夫人室潘氏從封許國夫人先公薨生  
至順壬申五月十九日薨洪武庚戌三月始葬鳳陽臨  
淮至是從公祔焉生男四人長威次域次璣次琛女一

人適黔國公子景祐孫男三女二揆公功行是宜銘詞  
曰

先時寓內勛勳弗靖蒸民有主資以戡定效用者將鷹  
揚其人徐常兩王開國蓋臣各有爪牙奮其威武惟襄  
簡公久佐徐府既定江淮亦拓中原自河徂陝益西其  
轅繇淮而北極是朔漠轉征雲南卓著勇畧最公在軍  
沐雨櫛風惟知徇國遑卹厥躬六安受國方倚大用天  
不憖遺黃梁遽夢上為震悼卹典是頒許國襄簡爵諡

具完鍾山之陰公所藏室壽正名垂燦然竹帛有桓其表有穹其碑千秋萬祀永永無期

勅贈開國輔運推誠宣力武臣榮祿大夫柱國同知大都督府事鞏昌侯追封陝國公謚宣武郭公神道碑 劉三吾

洪武二十年冬十有一月己亥皇上御奉天門工部侍郎臣秦達奏故鞏昌侯墓道之碑已具宜得文及時鐫之有旨翰林學士院製文臣三吾職在詞垣不敢以才

學謏淺為辭謹按其世系功勲年爵次第而銘之臣聞  
天興聖代大有為之君必篤生瓌偉英勇之將與之會  
遇以輔成其大業雖人也實天也當元季王政不綱在  
所裂裳為旗荷挺為兵草野自雄罔所適主時則今上  
皇帝龍興鳳陽天人合應有若中山開平兩王傑出其  
間是固功無與儼矣其知所趨向先後疏附厥有成績若  
鞏昌侯臣郭子興者亦豈偶然哉子興世鳳陽人拳  
勇有膂力善騎射自癸巳歲起兵首隸元帥郭某麾下



卽知所適主明年得滁州又明年得和州亦旣從龍濟江若米石若太平若溧陽溧水所向崩角義勇之聲日以暴矣丙申三月隨大軍進拔臺城先登授管軍總管繼陞統軍元帥攻圍常州身犯矢石晝夜不解衣甲為生蟣蟲九閱月城始下被賞優渥載調克宣州江陰宜興婺州安慶衢州勢劇破竹壬寅分兵之江西南昌得其全城癸卯八月進克鄱陽彭蠡之戰海艘駢進戒嚴所部人百其勇陳友諒計蹙中流矢死人知天命有歸

矣甲辰春侍上親征湖廣武昌洒血馳戰多所斬獲用

屢功擢鷹揚衛指揮使簡在上心俾從中山王拔廬州

拔安豐率先陷陣大敗姑蘇張士誠為之奪氣其平襄

陽下衡州定澧州辰州轉而蹂高郵踣淮安載拔浙西

湖州坐困姑蘇往往裹瘡力戰中山王以公之勇功聞

陞鎮國上將軍大都督府僉都督吳二年正月改洪武

元年上即位有事關陝命領其軍進討中原搤守潼關

三秦兵歛迹不敢出移戍鞏昌招摩逋殘嚴戢部曲西

戎羌夷兩境帖然進封鞏昌侯方倚之永鎮西垂而溘  
先朝露薨于家矣上為之震悼輟朝三日賻贈有加追  
封陝國公諡宣武以洪武十七年冬十有二月日葬聚  
寶山之原曾祖考某贈鎮國上將軍僉大都督府事護  
國追封光山縣子妣某氏從封光山縣子夫人祖考某  
贈驃騎將軍都指揮使追封汾陽伯妣趙氏從封汾陽  
伯夫人考某贈榮祿大夫同知大都督府事柱國追封  
鞏昌侯妣單氏從封鞏昌侯夫人配汪氏封鞏昌侯夫

人皆由公貴貤恩子男四人長景儀卒于五開次振次  
宗次官僧公生以某年某月某日薨以某年某月某日  
壽五十有四惟公自開國以來從龍上下盡瘁所事所  
至以英勇聞是故攻無不克戰無不勝視轉萬里之遠  
歷歲之久若堂與之朝夕焉雖鋒矢交集飢渴不時咸  
不避卹必盪殲渠克歸報終事乃已其依日月之光仗  
雷霆之威以恢拓疆宇勒勛西垂者亦人傑也哉詞臣  
揚厲為職是宜有銘詞曰

聖皇受命龍興鳳陽戡定禍亂經畧封疆篤生武臣先  
後相望惟陝國公實生帝鄉沈鷺其勇鐵石其剛乘風  
雲會依日月光旌麾所指敵摧鋒芒底定東南載戢戎  
羌萬里之遠如在室堂生前封侯式是鞏昌身後封公  
亦此西方聚寶之原不食之岡佳城鬱鬱公所固藏詞  
臣載筆德音靡忘子孫善保奕世流芳

大明左柱國信國公贈東甌王諡襄武神道碑

銘方希古

洪武三十一年九月壬辰皇帝御奉天門故東甌襄武王之孫昱頓首言曰先臣和沒已三年墓道之碑已具而未有刻文惟陛下憫之俾史臣有述焉制曰可臣昱至翰林以文為請臣謹以其事聞有詔俾為之銘臣乃言曰昔元德既衰天下大亂我太祖高皇帝以神武明聖之資哀生民之無辜奮袂一麾四方響應芟夷僭盜盪滌兇奸十餘年間遂濟大業雖曰天命所屬不以智力然猛將名臣之勛著于王室有可徵者昔王之歸鳳

陽新第也高皇帝有餞賜之勅其薨也有祭誄之文帝  
自謂與王同受知滁陽稱其智勇過人命勒石以紀勞  
績聖情深厚矣今陛下不遺舊而賜銘其碑以寵綏湯  
氏實行高皇帝之遺志臣執筆從太史後何敢卒讓謹  
按故開國輔運推誠宣力武臣特進光祿大夫左都督  
左柱國議軍國事信國公追諡襄武封東甌王姓湯氏  
諱和字鼎臣世居鳳陽縣之東湖里曾祖五一府君祖  
六一府君皆以王貴追封信國公考七一府君贈特進

光祿大夫右都督左柱國追封信國公曾祖妣某氏祖  
妣周氏妣謝氏俱封信國夫人王幼喪二親卓越有奇  
志嬉戲常習騎射指使羣兒父老異之及長身長七尺  
個儻饒智畧元至正間豪傑多起兵據郡縣王亦思自  
奮拔以取富貴壬辰歲聞滁陽王據濠兵勢強率所厚  
壯士十餘人仗劍從之滁陽王奇王驍勇置之麾下使  
從諸將畧地每在前行命為百戶取九灣攻濠之定遠  
得兵千五百人擢為千戶時高皇帝處滁陽王甥館王



委心推奉率兵從大洪山寨得兵八百陞長萬夫復從  
攻滁州得其帥以功多授管軍總管招集士卒益衆又  
明年甲午帝自取和州諸將多滁陽王舊部曲顧望未  
盡効臣禮惟王以所領兵聽命惟謹帝心嘉焉會義兵  
元帥陳額森復攻和州王與將士擊走之乙未六月帝  
渡江下米石定太平王獲敵馬三百士卒稱是旣而額  
森與其將康將軍水陸分道寇城王擊其水軍矢中左  
臂怒氣益奮中山王徐公達寧河王鄧公愈帥師由東

門轉戰城北破其步軍遂生擒額森以獻王分兵攻漂  
水句容克而守之丙申帝定建業三月王偕中山王取  
鎮江一日克其城兵不血刃陞統兵元帥復同中山王  
取金壇及富莊七月轉同僉樞密院事丁酉三月克常  
州奉命鎮守其地攻取江陰明年偽吳張士誠兵寇常  
州王力戰却之擒其卒三百十月復來寇俘甲士千餘  
舟數十艘馬數十匹賊勢為之少沮壬寅偕中山王攻  
無錫癸卯大破士誠兵于楊山斬其梟將獲甲首五百

級逐其別將莫將軍虜其妻子以還拜中書左丞甲辰  
士誠弟偽丞相士信寇圍長興王率步將吳福興會開  
平王常公遇春軍合戰士信大敗而退超遷中書平章  
乙巳擊江西劇盜姚大膽斬之遂取永新州戮偽左丞  
周安等籍士馬歸于京師仍出守常州丙午帝命諸將  
伐士誠畧太湖營于舊館降偽將呂左丞等虜其兵二  
千馬八十匹轉戰湖州守將張右丞降進擊吳江州將  
不能格亦降遂薄姑蘇圍之明年丁未為吳元年九月

中山開平與王益督兵力戰卒平姑蘇縛士誠以歸三  
吳悉定除御史大夫兼太子諭德階榮祿大夫時方國  
珍據溫台慶元三郡與士誠比境聞士誠敗固已震恐  
王督諸軍征之國珍懼乘大舶逃匿海島中王遣人持  
書喻以國家威德國珍卽率昆弟子姪待罪軍門得兵  
械舟楫以萬計所至不擾王之功居多乘勝下福州戊  
申帝卽大位改元洪武王畧定閩中諸郡至延平主帥  
陳友定怙險橫甚令其副出城降觀望持兩端王虜之

以歸東南海上晏然是歲九月帝幸汴梁王實扈從旣而與宋國公馮勝取懷慶澤潞晉絳二年同中山王拔河中渡河入潼關趨鳳翔越六盤關隴皆平明年與中山王宋國公至定西襲元將庫庫特穆爾營西北取寧夏至察罕諾爾獲其猛將虎陳定東勝大同宣府皆以勞先諸將九月還京師論功行賞錫以鐵券封中山侯號開國輔運宣力武臣階榮祿大夫勲柱國祿一千五百石明玉珍乘中國亂僭號四川以重慶為都玉珍死

其子昇立四年詔王及德慶侯廖永忠統諸將征之昇  
鎖瞿塘峽以遏舟師王以計敗之水陸並進直搗偽都  
昇不能支率其臣屬奉金寶以降五年同中山王北征  
窮追和林明年斃通州外郭八年移鎮彰德斃其城是  
冬追元逋臣巴延特穆爾于察罕諾爾獲馬牛羊無算  
十年正月元日帝念王之功加號推誠位特進階為光  
祿大夫職為左都督勲為左柱國爵為公國于信俾議  
軍國事加祿至三千石仍賜鐵券王益恭畏不自驕盈

繼與岐陽王李公文忠練卒于鳳陽鳳陽濠之賜名也  
明年巡撫西河州繕完其城郭營舍十四年偕中山王  
北伐下灰山擒其平章必里克及樞密副使昭通又明  
年詔至四川永寧治墉濠飭士馬十八年五開山獠為  
亂王帥師討之夷其窟穴俘戮四萬人及入朝王以春  
秋高思歸故鄉從容乞骸骨羣公次第以為言帝喜之  
賜寶鈔五萬俾造第宅于鳳陽而謂王曰日本小夷屢  
擾東海上卿雖老強為朕行視要割地築城增戍以固

守備王築海上數十城民四丁取其一以為兵守之二十一年新第以成告率妻子陞辭賜白金以兩計者二千黃金以兩計者三百鈔以緡計者一萬五千文綺四十端信國夫人胡氏亦賜金錢文綺甚厚俱降手勅褒嘉之二十三年元旦朝于京師忽被末疾且失音不能言帝聞之大驚卽命駕臨視嘆惋久之遣歸故里十月詔王之子將命召至邸賜以安車入殿廷燕勞備至復厚賚俾歸以俟有瘳二十七年王疾彌甚不能興帝思



見之特詔輿入覲手為摩撫語及舊勞對之雪涕賜鈔  
六百五十緡預為營葬之資二十八年八月七日薨于  
里第之正寢至是年七十矣訃聞帝感悼為之不御朝  
者三日追封定謚親為文授使者以祭命親王咸遣祭  
于其家棺槨明器冢壙皆官為之以是年十一月十二  
日葬于縣曹山之原詔肖像于功臣祠配饗于太廟祥  
禪必賜祭高皇帝禮遇功臣加恩于王恩禮之隆時莫  
與比夫人有婦德明詔稱其賢子五人曰昂署前軍都

督府僉事曰軌太原中護衛鎮撫曰鼐曰燮皆早卒曰  
醴同知左軍都督府階榮祿大夫將兵征五開卒于軍  
女五人長適德慶侯廖權次為魯王妃次適萬泉衛指揮  
俞鼎次適景東衛指揮賴鎮之子溶次適楚雄衛指揮  
袁義之子興孫男十一人曰昱暹昇晟勗景杲曷旻昊  
畢晟其嫡也孫女四人曾孫男一人女二人皆幼王沈  
毅質直勇而善斷不妄發言入聞國論一語不泄于左  
右行師受任有詔即行不少顧家臨敵果敢堅忍未

嘗挫衄有語及兵書者輒笑曰臨陣決機在智識敏達耳何以泥古為家畜妾媵百餘暮年皆資遣寧家得賞賜多惠鄉黨父老及孤貧無告者貴任公宰及歸田里見故交遺民意驩如也厥後羣公多先物故而王獨享壽考以令名終斯固保身之有道而始終不倦可謂盛也已今陛下追惟創業之艱顯揚刻銘使播不朽豈獨蓋覆湯氏之子孫蓋以昭揚先帝之功德而垂萬世也是用備著其事而獻銘曰

於昭上帝視下孔仁降聖儲才相慈兆民之顛隳俾  
聖康之復俾賢臣佐而襄之有元旣衰天厭其亂督生  
高皇拯綏大難龍奮于潛八極晦冥英傑如雲翼之以  
升惟東甌王旣智且武灼知天命早識真主衆方夢夢  
未決所從獨斷不疑委身效忠臣或擇君杖策千里生  
于帝鄉其社孰似寶劍彫戈折衝四方如虎如貔驅彼  
獯羊披淮濟江以作京邑京邑旣成皇業乃集東越僞  
吳坐鎮毗陵不騫不傾仗義為城帝德日宣遠懷邇服

王率之行勢若破竹既平姑蘇元惡就誅威鎮東南暨  
于海隅乃清關隴乃平幽冀萬邦來同獻其琛貝帝曰  
念哉勛我元勛爰啟土疆流慶後昆中山建侯遂公大  
國貂冠金劵繡裳赤舄海宇晏寧天下一家民休田閭  
穀粟絲麻王亦白髮燕嬉甲第伊誰致之天子之賜天  
子有詔共樂太平文錦兼金侑以百朋內暨夫人亦受  
寵錫璽書爛然觀者動色天實生才股肱聖皇豐其第  
祿俾之壽康壽考令終孰與之同天子之門式勸有功

沒登王封從饗宗廟始卒無瑕其忠有耀昭哉大明如  
日麗天載焯鴻勛以訓萬年

明文衡卷七十四

謹案卷七十三第二頁後五行額森舊作也先今

改 五頁後七行索諾木舊作鎖南 又布

哈鄂爾濟舊作普化兒只今並改後倣此 十

三頁前八行且實勒戩舊作乞失加 又松多

爾濟舊作舒朶兒只 又鄂溫都爾舊作阿烏


都兒今並改 後二行托和齊舊作脫火赤

又額齊訥舊作以集乃今並改後倣此 後四

行阿祖舊作愛足今改



卷七十四第十二頁後三行必里克舊作別里哥  
又昭通舊作久通今並改



總校官庶吉士臣張能照

校對官編修臣閔懋大

膳錄監生臣吳申嵐

膳錄監生臣吳魯田